

Dem Durchleuchtigsten Fürsten vnd Herren / Herren Wolff-
gang Wilhelmen Pfalzgrauen bey Rheyn / in Bayren / zu Gülich / Cleue vnd Berg Herzog / Graue zu Veldens /
Sponheim / der March / Rauensberg vnd Mörs / Herr zu Rauenstein / u. Meinem
gnedigsten Fürsten vnd Herren.

Durchleuchtigster Fürst
gnädigster Herr / u. Es melden die Historici in beschreibung des viersten Theils der Welt so sie Americam nennen / von Americo Vesputio einem Florentiner, der es neulich entdeckt vnd erfunden / daß so oft der König in berühter newer Welt Todts verfahren / seine beste vertrawoste Freundt sich selbst entlaibet / vnd mit ihm begraben lassen / Andere präsentiren vnd verehren dem todten abgestandnen Corper allerhandt stattliche Gaben vnd Schankungen / Klemodien vnd Mobilien / vnd was sie sonst liebs vnd wehrets haben / vnd besitzen / damit die Heidnische vnd Barbarische Völker ihre gute Affection, Lieb vnd Treu so sie zu ihrem abgelebten König tragen vnd haben / jeder männlich wollen demonstiren, vnd zu erkennen geben / In welchem Stück uns Christen würd vbel anstehen / daß wir den blinden Heiden solten weichen / vnd etwas beuor geben:
Weiln dann die bisz in das zwanzigste Jahr in der hiesigen HoffCapellen gestandene Leich des Durchleuchtigen

Hochgeborenen Fürsten vnd Herren / Herren Johans Wilhelm Herzogen zu Gülich / Cleue vnd Berg / Graue zu der March / Rauensberg vnd Mörs / Herr zu Rauenstein / u. Christseligen andenkens / E. Fürstl. Durchl. Weylandt / lieben Ohmen vnd Vorfahren / den 30. Octobris / des negst entwickenen 1628. Jahrs dermahl eins von gemelter HoffCapellen / mit einer ansehentlichen Volck reichen Procession / deren die ganze anwesende Ritterschafft dieser Fürstenthumb vnd Landen / neben vielen andern Herren vnd Prälaten Geistlichen vnd Weltlichen / mit gewöhnlicher Solemitet beygewohnet / in die Stift Kirchen zu ihrem Ruhebettlein ganz Fürstlich begleitet vnd gesenkt worden / Hette auch ich als ein Landtsaß / meinem in Gott ruhenden Landtsfürsten / nach dem Exempel deren in America / gern ein gering Anzeig der schuldigen vnderthänigen Affection vnd Neigung / meinem Amt vnd Standt gemess / erwiesen vnd erzeigt / Hab aber anfangs nicht gewußt / wonit ich solches am besten vnd füglichsten ihm fändte / Dann einmahl war vnd gewiß: Dass weder mit meinem Leben / noch auch mit meinem geben / dem abgestorbenen frommen Fürsten geholfen: Endlich ist mir ein

gefallen / Ich könnte meine innerliche im Herzen tragende
gute Affection vnd Deuotion besser vnd frülicher / auch
meinem Beruff nach/ gemeisselt nicht an Tag geben/ weder
wann ich den ganzen Actum der gehaltener oberwehnter
Fürstlicher Sepultur vnd Begräbniß in Kupffer stechen/
vnd in Druck fertigen ließe.

Welches ich dann hiemit thue / zuforderst Gott dem
Allmechtigen zu Ehren / der ganzer Posteritet zum be-
sten / dem abgelebten Fürsten zu Ewiger immerteichender
Gedächtniß ; Ewer Fürstlichen Durchlucht aber zu son-
dern gnädigstem Wolgefallen / Synthemaß dieselbe desß
abgelebten Fürsten negster Vetter seyn ; Darneben alles/
was bey diesem Gottseligen Christlichem Werck fürgan-
gen / Hochweislich concipiirt angeben/ vnd ordinirr,

auch selbsten eigner Person mit grosser Pietet vnd Andacht
verrichten helfsen.

Bitte derowegen vnderthamigst / E. Fürstl. Durchl.
geruh'en / diese meine / wiewol geringfügige/ jedoch aus; ei-
nem guten/wolmeinenden treuen Herzen herfließende tre-
we Arbeit im Gnaden auff vnd anzunehmen/ vnd mein gne-
digster Fürst vnd Herr jederzeit verbleiben.

Der Allmechtig gütig Gott wolle E. Fürstl. Durchl.
samt Threr jungen Herrschaft vnder den sicheren Schat-
ten seiner Gnadenflügel nehmen/ vnd noch lange zeit erhal-
ten / zu zeitlicher vnd ewiger Wolsfahrt dieses ganzen Bat-
terlandts / Amen. Geben zu Düsseldorff den 28. Juli/
Anno 1629.

E. Fürstl. Durchl.

vnderthamigster vnd gehorsamster Diener
vnd Vnderthan

Adolph vom Kamp.

Kurze